

# Peniaga baja didenda RM100,000



Soon Teck didenda RM100,000 oleh Mahkamah Sesyen Ipoh pada Rabu selepas mengaku bersalah atas tuduhan memberi rasuah kepada seorang penjawat awam pada 2018.

Mengaku salah  
beri rasuah kepada  
penjawat awam

Oleh NOOR AINON  
MOHAMED YUSOF

IPOH

**S**eorang peniaga baja didenda RM100,000 oleh Mahkamah Sesyen Ipoh pada Rabu selepas mengaku bersalah atas tuduhan memberi rasuah RM30,150 kepada seorang penjawat awam, empat tahun lalu.

Hakim M Bakri Abd Majid membuat keputusan itu selepas tertuduh, Lee Soon Teck, 53, mengaku bersalah atas pertuduhan pilihan yang dibacakan terhadapnya.

Tertuduh turut berdepan hukuman penjara 10 bulan sekiranya gagal membayar denda berkenaan.

Mahkamah turut memerintahkan wang rasuah itu dilucut hak kepada kerajaan Malaysia di bawah Seksyen 40(1)(a) Akta Suruhanjaya Pencegahan Rasuah Malaysia (SPRM) 2009.

Mengikut pertuduhan, lelaki itu didakwa memberi suapan berbentuk wang tunai berjumlah RM30,150 kepada Pembantu Penguat Kuasa Kementerian Perdagangan Dalam Negeri dan Hal Ehwal Pengguna (KPDNHEP) Putrajaya, Muhammad Fithry Hassan.

Perbuatan itu sebagai dorongan untuk melepaskan tertuduh daripada diambil tindakan undang-undang kerana menyimpan baja bersubsidi tanpa lesen di bawah

Akta Kawalan Bekalan 1961.

Kesalahan itu didakwa dilakukan di sebuah premis di Batu 6, Jalan Baru, Parit Buntar, kira-kira jam 10.30 pagi pada 8 Oktober 2018.

Pendakwaan terhadap lelaki itu dibuat mengikut Seksyen 214 Kanun Keseksaan, yang sabit kesalahan boleh dijatuhkan hukuman penjara tidak sampai 10 tahun atau dengan denda, atau kedua-duanya sekali.

Pendakwaan dikendalikan Timbalan Pendakwa Raya Maziyah Mansor manakala tertuduh diwakili peguam Kailashii Vasudevan Appu.

Pada April tahun lalu, media melaporkan tertuduh mengaku tidak bersalah di bawah Seksyen 17(b) Akta Suruhanjaya Pencegahan Rasuah 2009 bagi kesalahan sama.